

四庫全書

集部

欽定四庫全書

摘文堂集卷十

宋 慕容彥逢 撰

奏疏

論提舉官分巡奏狀

右臣伏覩陛下緝熙先猷增置官吏修水土之政行抵
貸之法興山澤之利以幸天下常平事任比昔加重諸
路提舉官于所部州軍理當每歲徧巡以周知官吏奉
行勤惰之實今諸監司歲以所部州軍吏互分巡則提

舉官所歷無幾其餘他司于常平職事既非其所任責則凡所檢察特取文具而已雖有二年一徧指揮不惟日月曠遠兼新舊官移易不常甚未稱朝廷考覈事功之意臣愚欲望聖慈特詔有司應諸路所部州軍數多如兩浙東西通為一路去處更增置提舉官一員并其餘路分並令每歲徧巡更不與他司更互分定仍令諸州軍于次年正月具歲終有無提舉常平官巡到徑申御史臺委本臺彈奏餘依見行條令庶幾職業振舉實

惠及民天下幸甚謹錄奏聞伏候勅旨

論諸路弓手奏狀

右臣竊惟諸路弓手是為鄉兵州縣之武備莫急於此
向緣紛更官司習玩選補鹵莽訓練希濶迺復以工巧
技藝之人充占員額私備役使而承行胥吏又用其所
親不問老疾疲弱特取其數歲時按閱類以差出為名
匿其不中格者故緩急追捕常患乏人矧今推行茶鹽
二法唯能禁絕私販然後商賈易售官課充羨欲絕私

販則諸縣弓手宜訓齊武事用以處警有犯必獲然後
姦民畏沮私販不行臣愚欲望聖慈特降睿旨命諸路
提點刑獄司專委官點檢選留彊壯斥去老疾疲弱者
其本縣官以工巧技藝隱占役使並根勘罪具狀以聞
庶幾有司遵承詔令武事加飭以壯守備謹錄奏聞伏
候勅旨

論諸路坑冶奏狀

右臣伏見諸路坑冶之利所助經費不為不廣其置場

去處有正官無幾餘止係轉運或坑冶司差官權監而
逐司又多廢條用例委本州郡官不惟被差者以其置
場皆深山窮谷之中人人規免而官屬稍不闕事即本
州倚辦多不遣行獨老疾不任事畏在長吏目前者方
始就職或不過半年又復交替豪民猾吏姦弊百出常
以不差正官為幸公家利源損失不可勝計臣契勘見
行勅令該載坑冶條甚備而有司便文僥倖不能悉心
遵奉臣愚謂宜降旨戒諸路提點刑獄及坑冶司常

切體訪苗脈興廢去處嚴切督察多方措置如合差正
官即依條奏舉其轉運及坑冶司差官權監並須選擇
能吏不得只要本州郡官仍令本州通判每季躬親點
檢庶幾關防始密上下畏守以副陛下理財之義謹錄
奏聞伏候勅旨

論府界旅櫬奏狀

伏見神宗皇帝仁心惻隱元豐二年以開封府界寺院
旅櫬積多命提舉官專切管幹斂埋惠浹幽明中外感

服迄今二十五年乃復充牴牾宇以至露積其間或閱
日既久別無管認或親屬雖存貧不能舉或藏器已毀
棄擲道旁此皆掩葬無期尤可傷閔臣愚欲望聖慈特
詔有司檢會元豐二年指揮及應干措置條件施行謹
錄奏聞伏候勅旨

上檢察病囚疏

伏觀皇帝陛下矜憫庶獄制為病囚檢察之法蓋謂愚
民犯法雖繫留訊治邦有常憲於其疾也飲食醫藥視

之猶赤子也臣等尚慮當職官吏不能深體德意欲望
聖慈令諸路提點刑獄司歲終會州縣病囚損失分數
除依條科罪外取一路最多最少各一處保明以聞特
降詔旨賞罰庶幾知所勸沮以副陛下好生之德

劄子

乞外任劄子

臣寒鄉孤進望絕顯榮遭遇聖明搜擇疏遠寢膺拔擢
備數從班叨冒寵榮積有歲月欲自勉強圖報萬分而

才分所拘初無可紀乃多罪悔達於聰聞矧茲銓曹職
任要劇臣代匱已久曾乏建明深虞曠瘝上孤眷獎伏
望聖慈除臣一外任閒慢差遣庶俾微臣獲安愚分

服闋乞外任劄子

右臣曩叨眷知進備詞掖雖更時序碌碌無聞尋遭親
喪遠去朝廷偷延視息今已服除伏望聖慈以臣艱苦
餘生俾安愚分特降恩告除臣江淮浙或京東一閒慢
差遣臣見於常州聽差指揮上瀆宸嚴無任恐懼戰栗

之至謹錄奏聞伏候勅旨

理會三禮圖劄子

臣竊惟功成作樂治定制禮方今六府既修三事既和
燕及皇天休貺並至功可謂成矣治可謂定矣講明禮
樂以幸天下其在今日伏覩見行三禮圖係國初聶崇
義撰集其間車服器用之制與元豐頒行經義時有不
同自國子監建三禮堂暨州縣學校率繪其圖以示學
者乃至有司所掌名物猶雜用其制未稱陛下統一道

德之意臣愚欲望聖慈特詔儒學之臣考據經義改定舊圖俾有遵承及付國子監頒行取進止

理會架閣劄子

臣所領中書後省合管五案凡冊禮及朝會應行遣事即上案主之付受諸案文書及本省雜務即下案主之編錄制辭及中書省人吏試補比較功過即制誥案主之在京有司關報改更差除等即諫官案主之逐月修起居注即記注案主之已上案分之事務要切兼編修

省詳隨事置局及逐名次召試進士武臣換官之類文字名件至多未曾專置架閣拘管每有檢照率多損失不唯申請煩紊兼證據不明前後抵牾臣契勘中書後省見有空閒屋宇欲乞專置架閣庫以本省逐案見管按查文簿書籍乃至祖宗以來辭冊及勅令續降等並置簿拘收以千字文為號周而復始應今逐案承受文字已結絕及無行遣限三日發送上簿接續結押仍乞於本省選手分楷書各二名主簿行遣庶幾紀綱整肅

以稱元豐建立後省陛下緝熙先猷之誠取進止

理會守令劄子

臣伏見陛下勵精政事比降明詔惠綏庶民教養多士所以訓戒丁寧甚悉真極盛之舉也臣竊謂陛下聖謨高遠固非臣子所能仰望清光至於推行德意志慮見於事實而與士民尤親者蓋在於守令使守令舉皆得人樂事勸功不以便文自幸則太平之基豈復他求乎朝廷制考課之法殿最賞罰既詳且備臣愚欲乞守令

任滿課入優等者除合得賞格外其未經選擢之人三省審察如人材果可任使隨其資秩特加獎拔或實諸省府寺監要劇之選或委以諸路監司按察之寄若此羣吏聞風莫不激勸各以行治自奮豈唯究宣惠澤上以副陛下惻怛之誠又足以搜揚疎遠以盡為官擇人之術其效豈小補哉伏望聖慈特詳酌施行取進止

理會守令考課劄子

伏覩元豐立守令考課之法至崇寧大觀隨事緝熙條

目完備直得神考訓迪羣吏之意大觀四年九月因臣
寮申請止存元豐舊條餘皆刪廢臣竊謂崇寧大觀緝
熙之美務廣德意比舊條加詳初無違戾欲望朝廷詳
酌特降指揮檢會施行

理會常平劄子

臣竊惟神考立常平之法加惠元元意旨深遠著令完
具而吏或不虔便文自營馴致蠹耗出多入寡近因臣
寮建言申嚴約束務絕姦弊惠及細民臣愚以為唯納

欠多寡最見推行之實使任職者悉心奉法計置及時
官無抑勒留難下無詭冒違法之人則良民輸納自無
稽違豈有出多入寡之弊臣欲乞應斂常平錢穀逐歲於
令佐印紙內批書納欠分數候三考滿日別立殿最之
法庶幾知所勸沮罔或偷惰如蒙聖允即乞詔有司施
行

理會抵當孤幼劄子

臣伏覩州縣孤幼財產官為檢校不滿五千貫召人借

抵當量數借請歲收二分之息資以贍養候其長立而還之法意慈惻盡於事情然間緣形勢戶虛指抵當或高估價直冒法請領不唯虧欠歲息迺至并本不納迨其長立合給還之時元檢校錢物並無見在其冒法請領之人或從官遠方或徙居它所或不知存在或妄託事端唯以空文來往因致合給還之人饑寒失所近雖降朝旨添立須有物力戶為保及限歲錢數足等條然於形勢之家未有懲革臣愚欲乞檢校孤幼財產不許

形勢戶借請及作保其所供抵當委官驗實估定價直
方許給借餘依見行修令所貴州縣遵守實惠及民如
蒙聖允乞詔有司施行

理會居養院劄子

臣伏見陛下若稽古訓自京師至州縣各置居養所以
聚鰥寡孤獨之人詔旨丁寧臣下遵奉道無孳瘠咸有
所歸發政施仁孰大於此臣竊以為鰥寡孤獨雖曰困
窮而至於被服禮義之化均太平之民臣居田野聞江

東溧陽縣以居養所見管屋宇隔截為八室用發政施仁必先四者為號使男女異處不相雜擾一方之民莫不悅服臣愚欲望聖慈特詔有司應州縣居養所並依前項體式隔截異室分處男女不惟子惠之澤洋溢中外而禮義之化不廢於困窮之民以副陛下愛民誠意取進止

理會祭祀劄子

臣竊惟國家稱秩祀典交百神而禮之考諸令格惟以

齋日多寡為大中小祀之辨大祀散齋四日致齋三日
中祀散齋三日致齋二日小祀散齋二日致齋一日參
稽情文各有攸當然祀之通於天下而最顯者社稷釋
奠春秋二仲州縣展事四方士民於焉觀禮而皆列于
小祀近緣臣僚奏請比附國子監修立外州軍釋奠儀
注散齋三日致齋二日則既升為中祀矣所有外州軍
社稷齋日義難獨殺臣愚伏望聖慈特詔禮官討論增
定

乞以假日特引對付史館劄子

臣備位詞掖幸以權記注職事日侍清光伏覲陛下辨
色視朝廷見羣臣雖雪霰風霧凜冽異常辰正奏引上
殿十班傳旨特引嘗近已初乃罷盛寒疇咨玉色無倦
十六日入冬至假陛下御延和引上殿十一班十七日
又引十班皆人人顧問曲盡事情告戒丁寧切中機會
節假內批降臣寮章疏及有他處分差除絡繹不絕臣
職在奉行捧讀悚激方是時羣臣賜告偃息于家而陛

下夙夜省覽憂國愛民未嘗暇逸陛下以天縱之聖而勤政若此蓋將訓迪有官永垂憲度而日歷之所紀邴報之所傳循舊襲常舉其大畧而已自非進得陪侍軒墀退得與聞幾政何以盡知其詳臣愚欲望聖慈以臣所陳降付史館及進奏院昭示天下傳之無窮俾中外官吏迺至民庶聞風胥勸罔不克勤上副陛下宵衣旰食之誠取進止

理會學校劄子

臣竊謂諸路學校州有正錄縣有長諭迺至其餘掌事
之人皆奉行貢士法令書攷陞選之詳蓋根本於此而
遠方諸生猶循積習之弊迺或持其短長糾率學衆輒
興訴訟以至發其舊愆以快私忿以此職掌類多畏默
求全鮮克振職臣愚伏望聖慈特降睿旨編修學制所
嚴立法禁不惟整肅學政亦以敦厚士風取進止

理會陳訴劄子

契勘命官遇赦恩許訴雪罪犯及用年限舉主除落過

名若在降赦二年外投狀陳訴者依條不許受理其諸
色人依赦許訴雪過犯或訴用法差誤理與命官事體
不異若於赦降後二年外陳訴者亦乞依命官訴理條
限施行取進止

理會捕盜捉事劄子

臣竊惟在京及諸路捕盜官捉事使臣雖以捉獲為職
其間有緣一時疑誤將贓證之人執縛根問多端恐脅
致虛有承伏及送所屬官司初憑元解事狀枷訊禁繫

文移追會經涉日月直至推究得不係元解情犯方以
無罪釋放或招撫一輕罪收坐蓋捕盜捉事之人當有
厚賞失則無罰伏觀政和勅縣以杖笞及無罪人作徒
以上罪送州杖一百臣愚欲望聖慈申詔有司比附上
條特立禁約庶幾盡心緝捕必獲犯人不致泛執無辜
枉被囚羈

刑部斷絕獄案劄子

恭惟皇帝陛下躬建皇極心澄化源德駿業隆超冠古

昔甚盛之舉不可一二數皆章明較著垂休無窮上帝
博臨珍祥紹至方將坐陽館而頒治登介丘以告成
時和歲豐家給人足薄海內外歡忻交通如在一堂之
上宜其民罔犯法而秋官以廷無留讞稱慶于朝矧天
寧密邇蒐講盛儀百辟奉觴異邦款塞於焉刑措孰不
歸仁臣等備數典司獲與擊壤之民上祝億萬歲無疆
之壽不勝歡忻鼓舞之至謹具進呈

臣等伏覩本部自四月二十日擬斷天下奏案盡絕已具

表稱賀仍乞宣付史官訖恭惟皇帝陛下以至德要道
纂隆聖緒成功巍巍同符堯禹自中都達於四方萬民
樂業家給人足以故獄訟衰息自凡奏讞之在秋官者
今已罄絕聞太平刑措實在茲時臣猥司邦憲親逢盛
事獲與擊壤之民共陶美化不勝大幸右臣等具到近
五年斷大辟數逐歲遞減比政和上二年計減一半以
上此蓋皇帝陛下盛德妙道克配上帝良法美意永祐
下民由中及外無有遠邇家給人足化行俗成以故獄

訟哀息幾至刑措臣等無任歡欣鼓舞之至謹具進呈
臣等伏覩本部自三月十五日擬斷天下奏案盡絕已
具表稱賀仍乞宣付史官訖恭惟皇帝陛下在躬清明
翕受衆甫天德地業超冠古初上帝博臨符瑞創見歲
豐家給民有愜志遷善遠罪罔或抵冒以故邦刑幾措
而秋官以讞章罄絕稱慶于朝太平之隆光于載籍臣
等實司中典親逢盛際無任歡呼鼓舞之至謹錄進呈
臣等伏覩本部自某月日擬斷天下奏案盡絕已具表稱賀仍乞

宣付史官訖恭惟皇帝陛下躬蘊道真丕冒九有盛德
大業超冠古初格于皇天休貺荐至四民安生樂業家
給人足以故遷善遠罪罔或抵冒而秋官屢以時無留
讞稱慶于朝凡厥有知孰不歸聖臣等親逢盛事獲與
羣倫上祝億萬歲無疆之壽不勝歡欣鼓舞之至謹具
進呈

臣等伏覩本部自九月二十四日擬斷天下奏案盡絕
已具表稱賀仍乞宣付史官訖恭惟皇帝陛下盛德妙

道高出唐虞制作設施自我作古凡歷世願望而不克
舉者今悉有成大功巍巍不可一二數是以天地並況
殊祥異瑞載籍所未見者踵聞于四方時和歲豐閭里
之民日用飲食欣欣愉愉咸有愜志方且扶老攜幼瞻
望華闕乞詔清蹕登封告成宜其風醇俗厚遷善遠罪
而不犯於有司太平若茲孰謂無象矧天寧在邇聿修
盛儀百辟奉觴異邦遣使而秋官以讞章罄絕稱慶于
朝凡厥有知孰不歸聖臣等親逢盛事無任抃蹈鼓舞

之至

臣等伏覩本部自九月九日擬斷天下奏案盡絕已具表稱賀仍乞宣付史官訖恭惟皇帝陛下配天立極執古御今凡法度禮樂所以嘉惠天下者出自獨斷煥然一新由中及外無有遠邇風移俗易民日遷善遠罪以故刑章幾措秋官論報屢以罄絕聞太平之隆高越前古臣等親逢千載之期不勝歡欣鼓舞之至

臣某等言伏覩本部自九月一日擬斷天下奏案盡絕

已具表稱賀仍乞宣付史官訖恭惟皇帝陛下躬蘊道
真默該衆妙運精神動心術措諸事業以嘉惠天下太
平之隆超越唐虞三代之上茲者歸德穹昊王檢推尊
極欽崇之精意禮成之日秋官以時無留讞稱慶于廷
羣倫底豫靈心昭荅和同天人使之無間其在今日臣
等蒲位攸司親逢盛事獲與擊壤之民上祝億萬歲無
疆之壽不勝歡呼鼓舞之至謹具進呈

表

興龍節賀表

臣某言高祺錫慶肇膺如達之祥華渚呈輝誕著寢昌
之證惟神聖挺生之旦迺文明赫盛之朝傾寰海之誠
心獻大君之睿算臣中謝恭惟皇帝陛下承休祖考配
德乾坤擁皇極之珍符叶炎靈之景運九功式叙諸福
畢臻屬當彌月之辰敢啓後天之禱奔航重譯執玉盈
庭臣生覲清時仕參通籍一人有慶懽同擊壤之氓萬
壽無疆冀想稱觴之頌

冬至節拜表

朋陽來復圭景加長占瑞靈臺謹書雲之令節拜章宸
閣脩亞歲之盛儀恭惟皇帝陛下道與時亨獨包衆有
化如天運咸叙九功恩浹寰區治高振古爰屬三微之
始方孳萬彙之萌保合太和召嘉祥而有羨緝熙純嘏
增睿算於無疆臣獲遙班聯與膺事任重熙累洽共欣
千載之逢歸德謝生知自一人之慶

皇后為冬祀禮畢賀皇帝表

日涓來復聿修三歲之祠禮迄熙成均錫庶民之慶珍
祥丕應協氣交流凡與見聞敷同慶賴恭惟皇帝陛下
與乾合德以道御時擴至治之規模固太平之基本升
禋陽位既哀對於百神旋蹕端闡期永膺於多福妾夙
緣天幸獲儷宸尊茲欣覩於盛儀實增榮於柔抱

內中侍御已下賀皇帝冬祀禮畢表

妾等言展家國南奉明禋而報本涓辰景至備熙事而
慶成百順應期千齡接統恭惟皇帝陛下德侔覆燾明

廣照臨揚欽燎以薦誠榮光下燭御端闈而肆宥惠澤橫
流於赫盛時迥高振古妾等幸陳禁掖均被宸恩初瞻
綵衛之還共獻履長之祝

貴妃已下賀皇帝冬祀禮畢表

伏以乘日至之辰順天正之序親祠陽位還御端闈福
祿來寧華夷均慶中賀恭惟皇帝陛下道該衆妙功叙
九歌緝振古之彌文聿修大報聲明裡之精意用迄上
儀靈心嘉虔景貺昭格妾等獲塵清禁夙奉至恩聞詔

蹕之甫還慄柔襟而載抃

內中夫人郡君已下賀冬祀禮畢表

伏以欽若禮經聿修禋祀既迄成於熙事用翕受於休
祥恭惟皇帝陛下道協彌綸誠通化育夙駕齋輅罄精
意以告虔還御端闈揚至恩而肆宥澤均動植慶浹華
夷妾等祇奉嚴宸獲瞻盛際願拜萬齡之祝冀伸千載
之逢

大長帝姬賀冬祀禮畢表

伏以涓辰展采既奏格於層壇發號施仁用均釐於寰
海情文允穆典冊增華恭惟皇帝陛下以天為宗于帝
其訓道洽政治九功叙而嘉頌興俗阜時和五臚備而
美祥格誕集衆有協成其儀安夙被恩榮實同慶賴聞
初還於綵衛輒仰獻於緇函

冬祀禮畢奏謝天尊閣佛閣等處表

親祠陽位祇見昊天靈心嘉虔祥應昭著實繇庇貺獲
底備成敢奉熏修以申報謝

冬祀禮畢奏謝內中玉虛殿三清諸聖等表

親祠泰壇祇見上帝百禮既洽萬福來寧實賴聖真默
垂保佑敢申報謝冀格顧歆

同前奏謝內中玉虛殿上九位等表

聿修元祀祇報昊穹百禮備成景貺昭答仰資庇佑用
格居歆敢率邦彝恭陳禮謝

同前奏謝欽先孝思殿帝后表

展儀陽位克承上帝之休肆宥端闡均錫萬邦之慶茲

迄成於盛典實祇適於大猷用罄精誠載嚴報謝仰虔
聰鑒永佑昌期

同前奏謝萬壽觀景靈宮諸帝后西京嵩山崇
福宮等處祖宗表

伏以薦一純于上帝獲考盛儀均五福于庶民既孚大
號實資庇佑克展靈承敢率舊章式陳報禮

謝賜宴表

玉陛疏恩方負非才之愧瓊林頒宴更蒙異數之加凡

在叨逾舉深慶抃中謝伏念臣等久安鉛槧素樂簞瓢
心徒醉於六經志敢希於五鼎幸千載飛龍之際陪一
時振鷺之游名標金榜之中昔稱千佛位列瑤池之上
人謂羣仙宮花叢御苑之春帝樂聳鈞天之奏光生韋
布榮動縉紳茲蓋恭遇皇帝陛下當饋思賢推食待下
念臣等齷鹽久厭備歷艱難賜臣等籩豆有加曲推慈
惠時輟大官之奉俯霑一介之微臣等敢不沒齒銜恩
終身飽德愛君憂國不忘頃食之間趨事赴功益謹素

飡之戒

天寧節謝御筵表

三靈效祉聿當彌月之辰百辟稱觴申祝後天之算恭
惟皇帝陛下照臨有赫覆幬無私紀流渚之祥虹允符
壽節詠零廷之潛露洽被燕慈臣等幸躋近班與陪盛
觀糜捐不足以副榮懷之遇鼓舞不足以盡歡欣之誠

欽定四庫全書

摘文堂集卷十一

宋慕容彥逢撰

表

賀太陽當虧不虧表

官占底日預陳薄蝕之期聖德動天遂格休祥之應睠
至誠之上達方協氣之橫流凡在照臨敷同慶賴恭惟
皇帝陛下福膺百順祐擁三靈行堯道以兢兢秉文心
而翼翼基圖增固治永叙於九功精祲交通變宜消於

十輝允符瑞貺益著亨辰臣等夙被寵恩過叨榮祿
收內壤心均四海之懽疏奏前旒壽獻萬齡之祝

賀增上神宗徽號表

合宮大饗載修崇祀之儀清廟徽稱誕廣通追之孝人
神協贊典冊用光凡諸含血而有知孰不懽心以胥慶
臣中謝國家七葉幅員萬邦魏乎先帝之隆凜乎三代
之上神靈如有熊而成之以敦敏濬哲如大舜而輔之
以溫恭承列聖之寢昌弗有其治跨百王而高蹈克成

厥勲于時率土之誠咸請中天之號禹功不伐湯德日
新方伏閤而未從遽號弓之莫及逮茲累稔申厥舊章
深求典謨博采雅頌爰因配帝之祀聿嚴宗德之名甚
盛無前持外王之土苴其傳罔極著上聖之形容恭惟
皇帝陛下剛德有爲達孝善繼率時昭考燕及皇天卜
太室之受釐協羣倫之歸美施諸玉冊赫爾金聲孝治
式孚蓋原於復命神功不宰尚出于強名臣獲際昌辰
預聞休蹟退惟簪履之舊淚灑周南遐思主璋之儀魂

馳魏闕

賀甘露降帝鴈表

儀盛漢廷方聿修于元會祥呈夏鼎如克享于天心凡
預榮懷敷同慶賴竊謂湛恩廣被協氣橫流精祲于焉
交通符瑞必以類至睠霄寒之甘露稟雲表之清英載
在遺編稱爲休貺或受諸草木而象德或降于宮室以
紀年粵若王正之初爰當帝鴈之上時乃創見昔所未
聞恭惟皇帝陛下體御至神道兼全于衆有用揚獨智

世用賴于九功民俗阜康邊陲靜謐雨暘咸若稼穡屢
豐藹藹治馨宜三靈之底豫瀼瀼和液彰百福之脩膺
臣等獲際熙辰幸瞻嘉應班趨上閣共傾向日之誠疏
奏前疏更祝後天之算

賀改元政和表

燎升陽時既涓饗帝之儀澤沛端闈爰易紀年之號書
文所暨民俗交欣臣中賀臣聞二帝之德雖隆其要不
外於稽古二典之文可考其詳尤在乎命官夫惟無曠

於天工是用克和於邦政紹茲能事屬在聖時恭惟皇
帝陛下巍巍成功以丕冒率土業業致孝以祇適先猷
仁洽道豐氣調時豫乃因祀禮更定歲元臣曩備近聯
今從左謫莫陪慶列徒緬想於賓傳均浹歡悰竊自同
於獸舞

謝賜政和元年厯日表

迎日前推先天誕告凡備守邦之吏寵頒紀朔之文俾
獲珍藏實均慶賴臣中謝竊以唐堯之考厯象虞舜之

察璣衡豈惟叙授於人時蓋亦靈承於帝事載在二典
訓垂百王恭惟皇帝陛下道體泰元治高振古五辰兼
撫致庶績之咸熙九叙可歌方萬世之永賴茲當改歲
申飭攸司課密度於清臺既無差忒錫成書于列郡冀
克聞知臣猥玷隆私與膺嘉惠金臺漏永共嬉化日之
長玉燭時和預慶豐年之屢

賀紅鹽表

地符薦祉鹽澤効祥方擬凝雪之姿忽示激丹之彩應

唯誠格福以類臻臣中賀自昔牢盆之羸爲時公家之
助當章聖之臨御嘗奏瑞鹺迨政和之紀元再書記史
希世難遇有識交欣恭惟皇帝陛下德協炎靈功昭烈
祖寶源恢復既豐足國之儲珍貺薦臻益永承祧之祚
臣曩由從橐黜領郡章身遠軒墀莫預稱觴之列職親
民社欣聆擊壤之音

代三省以下紫宸殿稱賀太陽不虧表

誠德誕孚嘉祥不應沴消內壤既虛十輝之占懼決中

區承賴一人之慶臣中賀恭惟皇帝陛下運乾剛以覆
燾居離正以照臨發政施仁靡匹夫之不獲彰善癉惡
致庶績之咸熙治馨方格於神明和氣宜通於精稷偉
茲穀朔時廼珍符臣等均被恩榮與膺任使仰瞻天路
亶爲千載之逢追効嵩呼敢後四方之賀

代宰臣以下賀黃河清表

天心佑德川后薦祥方兩涘羨溢之時有千載澄清之
瑞感由誠格福以類升臣等中賀惟河四瀆之宗惟水

五行之首效靈端拱屬更紀歲之元顯應大中適展親
祠之禮考今爲備視昔用光矧當乾寧之邦允協天寧
之號恭惟皇帝陛下性堯舜之孝悌躬文武之憂勤利
澤汪洋靡匹夫之不獲和氣充塞宜景貺之自臻簡牘
屢書華夷均慶臣等具膺寵祿與覲閔休俟河之清豈
人謀之可冀如川之至知聖壽之無疆

代三省樞密院請皇帝聽樂表

禮緣羣情聖人必爲之節喪從先祖後世靡得而踰恭

惟皇帝陛下仁稟乾元恩隆坤極念朱邸來嬪之舊有
紫闈占夢之祥制服過期輟朝增數去日已遠而慈軫
愈劇卹典雖厚而誠感未饜迺茲公除尚停雅奏臣等
考莊穆之故事本正元之舊章既終祔饗之儀即允叩
闕之請伏望宸寬追悼曲徇虔祈遵景德之詔音禮由
義起御鈞天之法部樂與民同

代賀皇帝御大慶殿大朝會表

律歷三陽咸慶王正之序圭璋百辟聿修元會之儀凡

在有生罔不載躍中賀恭惟皇帝陛下誕隆駿命祗適
孫謀甄商陶周凜凜百王之右參天貳地恢恢上聖之
姿九功之叙皆可歌五躋之來罔不備比奉寧真之恤
久虛大慶之朝永言孝思化式孚于下土錫茲祉福祐
克自于羣倫爰當發春赫舉四觀禮文甚盛典冊用光
臣獲際昌辰預聞丕纘周南歎滯莫陪鵷鷺之聯魏闕
馳誠徒切江湖之想

賀康復視朝德音表

法座天臨曠恩雨施方永膺於遐福用申錫於羣倫凡
預見聞敷同鼓舞臣中賀恭惟皇帝陛下誠贊化育孝
通神明以盛德承宗社之休宜萬壽等乾坤之久臣曩
由從橐黜守郡章辨色造廷想清班而獨阻焚香拜詔
覺協氣之橫流

代宰臣以下請皇帝受玄圭第二表

盛德茂昭珍符申錫將答帝臨之貺必嚴躬受之儀敢
冒威尊再陳誠悃竊謂玄曰純乾之色玄圭爲重土之文

旁連山岳之形中涵雷雨之象偉茲至寶兼備三才維
帝堯俊德之明有神禹成功之告自時厥後歷世靡傳
以迄于今蓋天所受恭惟皇帝陛下欽文格于上下孝
弟通于神明親九睦以和萬邦釐百工以熙庶績豐年
屢應嘉瑞薦臻肆追美於陶唐用發祥於珍物伏望皇
帝陛下體三靈眷祐之命納羣臣鼓舞之情特降詔音
俯從懇請先期涓告稱事辰儀舉一代之彌文昭有邦
之大寶以介無疆之壽以隆不拔之基

賀中宮受冊表

羣辟造廷陳有司之備物溫詞鏤玉正中壺之隆名凡
與見聞胥同鼓舞中賀竊惟乾坤作配以化育日月相
須而照臨故三代之興咸資內德之助而二南之盛實
為王化之基恭惟皇帝陛下聰明憲天濬哲稽古念昔
家邦之御必始於徽音矧茲宗廟之承莫親於同體肆
求茂德崇建長秋謀燕傳祠將行多男之慶星軒增耀
永符儷極之儀臣職繫左符身遙丹旆瞻母慈之丕冒

均民俗以交欣

代鄭樞密辭免樞密院表

驟膺綸制陞冠樞廷聞命以還撫躬罔措伏念臣事勞
無紀問學非優獨荷眷知遂陪機要挈鉞之量心常戒
於易盈伏櫪之材用豈堪於致遠坐縻廩祿徒閱歲
時方積懼於瘵官敢益隆於柄任恭惟皇帝陛下道
全衆有對時物以皆昌功叙九歌同天人而無間齋
居決事旰食視朝以聖明述作之資有文武憂勤之

志振曠古已墜之典紹先朝丕顯之謨發政施仁靡
一夫之不獲命鄉論秀致比屋之可封嘉祥緣類而
並臻殊俗款關而來享臣幸當盛際猥備近司海嶽
深崇豈效涓埃之補乾坤高厚難酬雨露之私儻冒寵
靈將速罪悔仰祈洞察俯徇虔祈特還贊書俾安
愚分

同前準備第二表

愚誠盡布冀寢誤恩睿意未從曲加寵諭顧深慙於

公義敢再冒於天威伏念臣出本諸生晚叨清貫自陪
樞筦寢閱歲華方上主有為之時實千載難逢之會
裁決機務取成聖心而臣蒙被寵靈無可論之薄効
奉揚明命但知仰於清光儻復超陞必速瘳曠伏惟皇
帝陛下循名責實以總覈於羣能公聽並觀以博
通於衆志因念怔營之懇特寬逋慢之誅改擇時
材追還綸制

中書舍人謝表

臣言伏奉告命除授臣試中書舍人仍改賜紫章服者
代言黃閣請避弗俞視草紫垣疏榮非據仍頒顯服併
免常儀責冒有加怔營滋劇臣誠感誠懼頓首頓首伏
念臣行能淺陋術業荒疎本乏才稱偶階仕進初緣采
擇獲對燕閒擢自膠庠任更臺閣諫垣論事久莫効于
涓埃柱史記言近未淹于歲月方虞叨昧將速譴呵曷
意明恩復加寵陟矧聖神述作之御實區宇亨嘉之辰
雲漢文章可觀而不可繪其象雷風號令可聞而不可

寫其音是宜潤色之尤難夫豈孱微之克稱恭惟皇帝
陛下以堯舜之孝弟有文武之憂勤廣延羣材協贊
庶績廼茲僥倖亦被褒揚臣敢不激昂懦衷紬繹舊學
典司訓誥雖慙深厚之辭陪侍禁嚴敢忽靖共之節臣
無任

謝再除中書舍人表

臣言伏奉告命除授臣試中書舍人者訓辭俯逮誤膺
求舊之除懇款冒聞莫遂由衷之請叨恩愈厚圖報為

弗忍遐遺風木易搖既永乖於榮養涓埃可補顧何憚
于糜捐

汝州謝表

叨榮已久宜速顛濟積咎滋多敢逃誅責恩深譴薄
感極涕零臣中謝伏念臣家起寒微望絕榮顯束髮
試藝遭時右文偶塵經術之科復玷辭章之選擢自
州縣進聯師儒迨登對于燕朝寢踐揚于要路初持
從橐距今八年兩貳省曹既書三考侍邇英之史讀

議大觀之禮文眷憐每發于金聲顧建必康于玉色
而臣才短難強器小易盈曾無可紀之勞廼有自貽
之戚致形論列終累保全尚特屈于常刑俾獲臨于
便郡此蓋伏遇皇帝陛下體乾在上與物為春如日
方中容光必照念臣與陪帷幄嘗奉燕閒察臣參掌
銓衡粗勤職業用加寬貸薄示小懲臣撫躬深思刻
骨永戒才非太史敢興歎于周南心類子牟但馳誠
于魏闕

謝復修撰表

分符汝海方循省於前愆列職書林俄霑濡於需澤危襟增激感涕交流臣某誠惶誠懼頓首頓首伏念臣系本單微進由孤遠簿書累考安州縣之卑棲靡泮八年甘齏鹽之冷宦偶緣登封寢被使令接鵷鷺之後塵侍槐楓之清燕對菲之選皆拔自於聖知絲綸之除每特從於中出而臣受材譴薄賦分竒艱無可紀之勞能有旣彰之罪悔誤膺慈側獲貸嚴誅假以郡章閱茲時序

謂當永黜尚不遐遺恭惟皇帝陛下德與日新仁如天
覆察臣陪扈滋久樸拙無他閔臣擯斥以來憂兢愈劇
用加甄復示不弭忘臣昔冒恩私親承訓敕奉法循理
敢自替於前修盡節竭誠誓益堅於素志

謝除兼太子賓客表

臣某言伏奉誥命除臣兼太子賓客者宸毫親灑詔檢
中頒即建禮之舊聯兼承華之顯列仰膺賁冒俯積忸
營臣某誠惶誠懼頓首頓首竊聞自昔宮僚維時人望

蓋毓德於初載必選賢而與居矧當調護之榮尤出搜
揚之屑如臣者以蹇淺之學問無卓異之行能奮繇寒
鄉最為孤宦參粉閨之餘論豈稱所蒙奉銅輦之後塵
益慙非據恭惟皇帝陛下端本以御家國因能以用
人材謂臣久綴從班講聞謨訓察臣幸陪經幄粗識
淵源因誤褒嘉遂階擢序臣敢不砥礪素節激昂懦衷
念左右前後之人罔非端士陳父子君臣之道敢替前
修

謝傳宣入伏早下表

使華俯逮天語驟傳念茲暑伏之臨錫以夙休之寵拜
恩優異揣分兢慚伏念臣問學空疎文辭淺拙叨長憲
部權直禁林黿嶺風清豈覺午陰之燠花輒日永初無
內務之繁敢冒慈憐俾從暇豫此蓋皇帝陛下招延時
俊優假詞臣特蠲退食之期昭示閔勞之意雖殫千慮
曷報萬分

兵部侍郎謝表

臣言伏奉制命除臣試尚書兵部侍郎仍賜對衣金帶者備員西掖久玷恩私貳職夏官益踰分願仍有匪頒之寵俾爲服飾之華責冒併優怔營滋劇臣某誠惶誠懼頓首頓首伏念臣屬辭淺陋承學迂疎猥越稠人寢塵清貫方聖神熙洽之運實文物光亨之辰獨幹機衡孰測乾坤之造親御翰墨共瞻雲漢之章而臣重以非才再司外制曩奉燕閒之對特形褒獎之言揣實未安拜嘉增惕敢圖眷錄復與甄陞此蓋皇帝陛下溥博兼

容清明旁燭將曲成於萬務靡求備於一夫致茲孱微
於焉僥倖臣敢不祇循名節恪赴事功圖報國之涓埃雖
難稱塞比向陽之葵藿永勵忠精

謝除刑部尚書仍賜對衣金帶鞍轡馬表

寶跗親御芝檢中頒進冒寵除曾莫伸於懇避薦叨蕃
錫顧曷稱於恩榮臣中謝伏念臣家本寒鄉分安末宦
偶緣推擇寔備使令自邁從班于茲十載心雖許國初
乏勞能智昧保身嘗嬰罪悔頃膺名札再貳銓曹惟雨

露漸滌之私實天地生成之造於焉圖報豈不知難取
誤者憐復加擢序矧出笥衣之麗束以兼金仍分廐駟
之良附茲沃轡併深僥倖益重兢慙恭惟皇帝陛下心
運道樞躬持慈寶是與神物既符堯禹之隆無曠庶官
用襲典謨之美顧如孱陋亦與褒揚臣敢不增勵樸忠
愈堅素守虔共夙夜靡懷出位之思兢慎簡書期副好
生之德

賀刑部斷獄表

民俗可封刑章幾措當春秋發生之旦無簡書請讞之
文囹圄畢空頌聲交作臣等中賀竊謂平國而用中典
亦以教民嘉師而監祥刑於焉止辟唯皆進其獨志迺
不犯于有司屬在聖時追隆治古鈞金既息丹筆何施
恭惟皇帝陛下心宅道真泛觀衆妙躬建皇極丕叙九
疇高靈格而百順臻美化行而四維舉肆克清于常憲
其永祐于多方臣等獲備有官欣逢盛事紀太平之文
物願詔史臣頌至治之本原豈知帝力

治定功成風移俗易惟茲臣庶咸自遠於祥刑至于海隅方永清於庶獄報囚悉下奏謝無留凡與見聞敷同慶賴臣某等誠歡誠忭頓首頓首竊以聽兩造之備雖有司存決五辟之疑必從中覆唯空幽囹圄絕丹書若時閱休屬於盛際恭惟皇帝陛下隆追考翼默蘊道真集前聖之成以建有極之會體上天之載以澄萬化之原宜致嘉師罔干常憲臣某等優游退食蔑無任事之勞鼓舞抗章願奉維祺之祝

甚盛之德既丕冒於羣倫幾措之刑遂追隆于振古赅
囚云絕丹筆不施凡與見聞胥同鼓舞臣等中賀竊以
幅員至廣獄訟寔繁豈叅獻之攸司無一辭之可聽太
平之象茲昭示於多方至治之聲蓋敷聞於在上躋時
若此唯聖爲能恭惟皇帝陛下執古御今體元贊化道
包衆有對時物以皆昌功叙九歌同天人而無間用永
清於綿宇俾不犯於微文臣等位列秋官職司憲牘嘗
講聞於盛事不自意於親逢

道與時升慶爲民賴邦刑幾措廷讞無留恩浹華夷事
光載籍臣等誠歡誠忭頓首頓首竊以臯陶之美帝舜茲
不犯於有司周公之戒成王其勿誤於庶獄追隆治古
屬在盛時草鞠圜扉吏停丹筆恭惟皇帝陛下躬建皇
極心澄化原集前聖之成以欽承乎宗社體上天之載
以丕冒乎家邦百度既新九功咸叙用罔干於靈制期
永祐於嘉師臣等叨奉恩書與承德意願上萬齡之祝
庶伸千載之逢

帝德懋昭民風丕變方共陶于美化幾不犯於微文獄
靡淹因廷無留獄謂如盛際實邁前聞臣中賀昔在神
宗紹隆列聖敬用三典分建有官凡厥罪疑悉從中覆
偉茲率土之衆曾無麗獄之辭致治若斯維聖時克恭
惟皇帝陛下濬哲稽古聰明憲天心運道樞以澄清於
萬化躬持慈寶以拊育於羣倫百度交修九功咸叙用
永綏於綿宇俾自遠於祥刑臣等叨備秋官實司靈制
吏停丹筆共欣不世之逢疏奏前旒願奉無疆之祝

道洽政治風行俗成民未占而有孚刑幾措而不用報
論悉下按鞫無留自昔鮮逢於今屢奏臣中賀竊以疆
理至廣簡書實繁維時嘉師罔干常憲當宣室齋居之
暇絕季秋請獻之文矧邇誕辰方蒐盛禮朝紳拱極共
上萬年之觴使節造廷聿修重譯之貢於焉止辟孰不
歸仁恭惟皇帝陛下高拱穆清適觀昭曠會衆府以建
皇極執至要以澄化原無疆之休既昭受於上帝百順
之福永敷錫于庶民宜幽圖之一空靡微文之可議臣

等叨膺推擇均與榮懷恢太平極治之基孰知帝力紀
甚盛無前之蹟願詔史臣

民知遠罪冒犯寢希吏有奏疑報論即下以盛世土疆
之廣無攸司簡牘之繁歡心交通協氣充塞臣等中賀
竊聞堯舜之治章服異而俗已徵成康太平圉圉空而
刑不用雖曰古今之異茲如符節之同恭惟皇帝陛下
默運至真獨觀衆妙精神運而心術動美化自孚禮樂
著而法度彰庶功咸叙用臻丕應克邁前聞臣等叨備

秋官與頌中典頌天地之大德難盡形容書帝王之極功願貽筆削

企九清之真境初薦鴻名格四海之歡心遂空幽囹當熙事備成之日訖季秋請獻之章和氣橫流靈心昭答臣等誠歡誠抃頓首頓首竊以箕子之陳皇極用敷錫厥庶民周公之告微言其勿誤于庶獄追隆古訓屬在聖時宜多福之聿懷致五刑之幾措恭惟皇帝陛下獨觀衆妙懋建大中叙巍巍之成功增光列聖揚顯顯之

令聞高出百王赫茲太平是爲至治迺歸德于穹昊肆
展采于禁廷玉檢推尊竭欽崇之精意丹書告慶息祥
覆之徽文臣等叨備秋官與頒中典覩天人之無間孰
測神謨紀時物之皆昌願貽信史

民承休德鮮或犯於有司吏絕疑文期永清於庶獄頌
聲交作和氣橫流維茲至治之興永謂太平之象臣等
誠歡誠忭頓首頓首竊聞好生者天地之大德措刑者
帝王之極功於鑠盛時乃彰不應矧屆就盈之月聿當

兆聖之辰百辟稱觴異邦款塞有如天保共歌萬壽之
章曾是呂刑亦紀一人之慶恭惟皇帝陛下誠參覆載
功格神明典章文物之隆百度畢正道德仁義之備萬
邦咸孚用格淳風罔干中典臣等獲塵任使祇奉詔條
敢抗囊封申獻後天之祝願貽汗簡具形擊壤之謠

寶祚無疆屆三元之華旦祥刑不試訖五辟之疑文盛
事係傳羣心交抃臣等誠歡誠抃頓首頓首竊以周官
布治紀正月之始和呂命訓刑美一人之有慶追隆古

治屬在聖時恭惟皇帝陛下道心之微獨該衆妙帝德
之運丕叙九功天貺傳臨春祺紹至用敷錫於黎庶期
永措於丹書臣等獲備憲曹敢後四方之賀願貽史觀
時書千載之逢

時靡有爭刑措不用當宣室齋居之暇訖季秋請讞之
文歡心交通協氣充塞臣等中賀惟土宇生齒之衆有
獄訟簡書之繁於鑠嘉師克承休德茲報論之悉下知
運繫之一空矧邇誕辰方蒐慶禮臣鄰拱極夷裔觀光

玉帛駿奔紀虹流於華渚桁楊盡委奏草鞠於圓扉凡
厥懷生於焉歸聖恭惟皇帝陛下道侔天運與物皆昌
政本日新使民不倦揭太平之備典御假樂之盛時年
穀屢豐珍祥沓至顯顯百順之福巍巍九叙之功方將
坐陽館以朝諸侯登介丘而禮上帝繇一人之有慶敷
錫多方致雅俗之無刑適追治古臣等優游導職鼓舞
抗章竊効嵩聲共獻萬齡之祝願貽史筆特書千載之
逢


福以類升慶爲民賴當三朝之勝會訖五辟之微文盛事係傳茂恩旁暢臣中謝海宇至廣犴獄實繁唯底時雍乃臻刑措矧正月布治之始方萬民觀象之初百辟奉觴異邦在列由中及外如皆樂於一堂以古況今豈太平之無象恭惟皇帝陛下帝德之運乃聖乃神道心之微惟精惟一懋建皇極永清化原肆丕冒於嘉師罔或干於中典桁楊不用簡牘何施臣等叨備攸司獲觀丕應奉萬齡之祝方幸造於朝紳書千載之逢願特頌

於史觀

代宰臣以下賀獄空及大理寺斷絕表

日畿嘉靖四陳圉圉之空棘寺肅清兩奏簡書之絕臣
隣歸美郡國告成曾未涉於歲時已屢編於史冊謂如
盛際實掩前聞臣中賀竊以治格熙淳教化行而爭訟
息俗躋富壽衣食足而廉恥興迺形止辟之風克副好
生之德恭惟皇帝陛下神機獨運聖學兼該以文武之
憂勤有堯舜之孝悌繼志述事動懷明發之心布政施

仁每頒中出之詔民咸遠罪邦用措刑矧當孟冬甫臨
誕節北隣修慶西敵造朝上奉萬年之觴共申善頌下
罔一夫之獄昭示閔休臣等均被寵恩共膺榮祿願稱
燕雀之賀庶殫葵藿之誠



欽定四庫全書

集部

撫文堂集卷十二

三

詳校官庶吉士臣陳若霖

侍讀臣孫球覆勘

謄錄貢生臣黃琮

謄錄舉人臣黃道颺

欽定四庫全書

摘文堂集卷十二

宋 慕容彥逢 撰

頌

神宗皇帝聖政頌并序

臣某言臣幼釋耒耜為諸生學問辱在鄉選
遂竊名第紹聖二年初立宏詞科有司以臣
程文奏御蒙先帝誤恩擢備學校於茲七年
矣惟臣質薄材下行能亡異循循默默罔克

稱塞獨觀自昔大有為之君其宏休偉績必
有俊傑之士馳騁翰墨鋪張揚厲以警動天
下傳之無窮恭惟宋興百有餘年神考以天
縱之資崛起於五聖之後內修法度外寧邊
徼日月所照生息理極巍巍乎典謨所陳奚
以尚此陛下踐阼推原太平之自發德音下
明詔尊崇廟祏百世不祧建景靈西宮以顯
承為館御之首其永紹裕陵之言形於聲詩

繼志述事之意揚於訓辭學士大夫宜廣陛下孝思之誠為雅為頌以形容神考之盛德大業如維清執競長發之詩臣是以不勝惓惓復自念漢永平徼外蠻夷槃木白狼獻詩歌德譯在史館矧臣自託於藝文待罪國子雖語言淺陋不足自効夫豈蠻夷之不若哉謹齋心滌慮撰成神宗皇帝聖政頌一篇願辭不稱事未究萬分之一亦臣之極思也如

蒙陛下假清閒之頃特紆睿覽臣退入溝壑
死且不朽謹昧死繕寫隨表上進以聞臣無
任瞻天望聖激切屏營之至臣誠惶誠懼頓

首頓首謹言

頌曰有宋受命卜年維億前義後昊配天作極於赫神
考紹休五聖篤實輝光剛健中正考古驗今慨然有為
手撓顧指雷厲風飛秦漢以還因陋就寡樂變於夷禮
求之野下及五代十有三君朝弗慮夕遑恤典刑爰自

建隆寢明寢昌一變至道以詔後王神考若曰惟天祖
宗既以命予予曷不從迺收羣策斷以不疑乾旋坤轉
咸蹈厥機王政之行越有先務水利土工惟民是裕既
勸相之申以保息懋遷有無平頒興積孰謂民遠如手
撫摩遣使宅牧究宣惠和昔在祖宗賦力於下校登夫
家以令施舍行之百年民執官功法久必弊唯變乃通
神考念茲先定等籍歲均厥輸官為僦役商農工賈咸
奠爾私毋擾牒訴毋虞鞭笞昔在有周士貴以肆賓興

賢能惟德惟藝既望終魄弊極於隋雕蟲取士壯士不
為神考念茲罷黜聲律論秀烝髦選取經術賢闕載闕
數學惟醇鋤荒剔蠹統一道真昔在有周六卿分職區
區字文嗣修品秩唐室建典圯於朱梁名實紛貿徂為
故常神考念茲董正在位參稽周唐以辨官治若網在
綱小大相維循名責實百工允釐昔在有周稱扶祀事
惟郊配天惟饗配帝曲臺失職淪胥異聞或陳九祭或
創魚尊神考念茲章別隆殺靈神一天聿嚴專配惟聖

饗帝惟孝嚴父發揮祿容以格神祐昔在仁祖作宮永
安名曰會聖以游衣冠厥惟京師數奉神御散於羣祠
禮若未具神考念茲迺卜景靈陰藏陽耀寶社萃興像
設嚴嚴颺馭降格妥侑孔時裸獻維則昔在寶元元昊
陸梁爰暨熙寧交趾亂常惟羌惟蠻乍臣乍叛羈縻涵
養習為驕悍神考念茲迺伐仇方南潰楚越右復河湟
河湟既復羌失右臂揚武橫山往城要地昔在有隋醜
河為汴控引淮泗實達江漢濁流千里洶洶電激駘推

艦覆間不容息神考念茲迺導洛水繹繹清源來自熊
耳盈科而進匪亟匪徐風航雨揖既安既舒惟昔刑書
編次散勅與律並行時損時益凡目寔廣疎密不倫輕
重抵牾罪失厥情神考念茲肇修品章科條金玉以約
御詳蒐補闕遺刊正謬誤芟夷潤色制例兼著猗歟偉
歟經始熙寧迄於元豐展也大成鈞衡鍾龠車服旌常
軌量以度物采以彰金石按協歷象考證以諧八音以
齊七政藥劑有任工技有程緝熙庶績罔不勵精賞必

選勞罰匪作惡播告不匿俾克畏慕倖優公家交屏私
室砥礪廉隅以清回通議刑左學訓武西序博延數塗
疇逸銓叙課試任子甄用公族較短較長俱收並蓄聯
民鄉遂寓以伍符爰糾姦慝爰叱追胥并鉞參旗百將
分戍前茅後勁既閑統馭簡稽戎器搜閱材官帑廩備
預廢牧阜蕃惟時惟幾規模宏遠神而化之用藏隱顯
於乎神考試明生知終始典學道心精微肆筆成書吐
辭為經河洛之瑞雲漢之明明明廟謨出入韜鈴鍾靈

聖武天動神潛外絕進獻內擯聲色覽奏夜艾聽斷日
昃苑囿弗繕宮室弗營城池襲固府寺增宏迺對草萊
褒進富谷一藝必庸小善必錄賓禮耆舊省納諫諍以
鎮澆浮以激柔佞追美先正表揚厥勲圖形原廟如漢
麒麟睠言闕官義爽同几升祠四后式燕祖妣明發不
寐有懷二宗祇嚴徽冊維極顯崇奉事東朝恩性天至
輦道安居懋昭孝治友睦同氣華胥相輝神禎匪効羽
翼在茲惟功與德儷蹤典墳規重矩疊不可殫論十有

九年休應以類海不揚波遠人慕義惟時臣子薦號中
天謙冲退托詔無復言介丘壇壝日月以冀獨觀昭曠
抑而弗議惟天祐之聿生元聖永明孝思答揚光訓迺
尊廟祐百世不祧若武之穆若文之昭迺建西宮列峙
中經比隆皇武冠以顯承祖功宗德既克兼之作聖述
明惟其盡之子子孫孫率迪大猷無有後艱永孚於休
記

甘露記

予守汝海以堂字敝甚徙寢室於訟廳後之涼堂上舊
隔舍為予書院涼堂之後隔舍之前有竹數十竿予出
入廳事日盼此君一夕夢有人告甘露降矣子奚弗省
也予次日曉偶記所夢往視竹上露顆圓瑩如珠點綴
甚密嘗之味甘如飴時大觀四年十有一月晦也自經
晴日或暴風大霧又三雨雪雪既釋露凝如故予初折
示郡寮留賓几案竹葉已瘁而露益明潤既久味若糖
霜然至十有二月晦竹間粲然猶不晞云

香山天寧觀音禪院新塑大阿羅漢記

汝為州當嵩山之陽縈帶汝水土脉膏腴旁近郡旱
潦不登汝輒豐稔以故民力優裕地左許右洛南襄
北鄭而非舟車衝道賓旅自遠至視其閭里愉愉舒
緩謂之樂郊然僑寓者多晉人習尚儉嗇室宇僅蔽
風雨不厭庠陋車馬衣服大率稱是而獨崇信鬼神
祭奠獻施無所吝惜其奉佛尤為勤至雖五代干戈
擾攘日不暇給而境內禪刹號古道場者三四其名

僧機緣見於載錄者踵相躡也香山寺在郡城南百餘里唐宣律師嘗聞之天人以是為觀世音菩薩化身之所士民重趼瞻禮罔有虛日竟有祈禱佛光現前或小或大或遠或近或多或寡合散轉移不可測度乃至現於大雨霧風雪之中其靈應顯異蓋若此大觀三年住持比丘法成謂其徒曰茲地殊勝邦人欽奉而像設故壞散列於埃壒之下網絲之間四方來觀者生慢易不可不易迺命工造夾紵縷金大阿

羅漢十有六從侍十有四龕帳供器皆備費凡三百萬出常住贍衆之餘間有助緣者初未嘗干丐也四年秋設齋慶成有光現於塔頂經數日乃散嗚呼色見聲來釋氏以為邪道至莊嚴布施則又以為必若是然後為信心成師有得於宗乘者於此宜辨其說矣然今天下山林勝處皆建道宇佛祠而佛祠尤盛如香山光景效靈又天人顯告見於宣律師傳甚詳非它叢林比也成師方舉揚真諦而不廢土木之飾

此非徒然為演其意而說偈言

諸佛之示現如彼水中月影隨霑潤生豈復有量數
羣生欲見佛亟以聲色求如攫水中影圓明散何有
莊嚴具百寶佛子所當知閔茲迷妄心方逐萬境轉
瞻言一念起如土布嘉種因緣能發明長養至成就
香山勝妙地觀音嘗降身精廬聳摩雲神物陰護衛
土民輕千里聞所聞而來佛光應宵矚讚嘆世希有
復覩像設姿樂說無窮盡如是展轉聞咸發歸依誓

不思議功德上以贊宸躬遐算等乾坤萬邦均慶
頤

笏記

集英殿春宴笏記

祥風應律茲為布德之辰
滑露零廷爰舉示慈之宴
恭惟皇帝陛下乾坤化育
日月照臨有壬有林咸序
九賓之列如山如阜共稱
萬壽之辭

又

誠心昭格沴氣消收凡在照臨敷同鼓舞恭惟皇帝
陛下如乾獨運與日並明治功方叙於九歌稷異宜
消於十輝臣等夙膺榮祿寢冒近司獲被休祥實均
慶賴

又

誠格上穹變消內壤凡居覆燾均被榮懷恭惟皇帝陛
下丕叙九功誕膺百福方珍祥之沓至宜沴氣之潛收
臣等叨備近司與聞休應奉千齡之瑞祝肩四海之懽

心

序

御製論大道文後序

臣某拜稽首言曰道若大路然凡麗乎聲色象數孰不由之近取諸身嚔笑顧指起居食息無非衆妙之所寓惟其由之而不知故逐物轉徙去本益遠聖人於此立言開明俾聞之者如索塗冥行廓然見曉隨其性分各即所安嗚呼非博大真人孰能與此恭惟皇帝陛下躬

蘊道直懋建皇極所以配神明享天地不冒羣倫者既自得之方且深根固蒂長生久視以同乎太古又親御翰墨叙大道之要昭示訓迪自義畫禹疇與夫琳札所紀瓊笈所藏於焉發揮言約理盡萬邦臣庶伏讀睿文迷者斯復窒者斯通是訓是行同焉皆得將見還淳返樸如太古之時顧不盛歟

通英閣無逸孝經圖後序

臣竊觀國家承五季之後太祖太宗經綸草昧南收江

湘西定蜀漢北翦汾晉盪滌妖祲天步廓清迄於太平
厥惟艱哉真宗繼之中外嘉靖緝熙百度文物粲然仁
宗承三聖之後念創業之難與夫持盈守成之不易也
業業兢兢常懼一事一物之失宜不足以駭惠前烈其
默而為思言而為議見於施設法度政教所以照臨海
島甚盛所以加惠元元甚厚猶以終始為一者帝王所
深慎也於是考先聖人之言尤切於治者以自勵乃命
近臣書無逸圖於閣之左又書孝經之天子孝治聖治

廣要道四章圖於閣之右朝夕顧瞻若周孔在焉昔周公作無逸陳古先后之盛與夫稼穡之艱難盤樂游田之害政以戒成王而其務以勤為先孝經之四章稱先王至德要道所以和同天人之際者而其原以孝為本是二者人主正心修身以御家邦無以尚此夫仰天而天不倦俯地而地不怠則成位乎兩間者孰過於勤在天有經在地有義則成能乎兩間者孰大於孝且有天下者非謂以天下奉一人也天下之大以一人治焉以

至衆望至寡則其責備以至靜視至動則其慮深得失
在於九重而利害及於四海善惡垂於萬世故人主必
金玉其言規矩其行德合天地明並日月然後足以垂
無疆之休然則周孔之訓其可須臾忘邪雖然此豈有
他哉顧在心術之間而已誠能處堂陞之廣而思天下
之民有不安其居膳膏粱之旨而思天下之民有不飽
於粟服綺紈之美而思天下之民有不足於帛臨鐘鼓
臺榭之樂而思民之所以憂享宴安優游之逸而思民

之所以勞日旦坐朝鷄鷺在列而思賢士或有未進章
奏在前聽決可否而思事情或有未通念前人之所以
託於後萬邦之所以願乎上者夙夜不替曰若是而後
為古先王之勤又若是而後為天子之孝也惟勤與孝
一舉兩得而天下不治風俗不美頌聲不作天瑞不至
者未之有也仁宗允蹈之是以盛德成功格於上下詒
燕後世比隆唐虞其效豈不彰明較著哉夫尚論其人
於寥寥千有餘年之前求其遺言置諸左右若朝夕納

誨然願治之意深矣遠矣嗚呼盛哉臣拜首稽首謹序
送吳顯道序

熙寧元豐間某為兒童時聞顯道名至會稽始幸交焉
厥後紹聖某年山陰令闕顯道攝邑事士大夫往觀焉
時婚田務開牒訴盈庭吏抱案牘列廡闐溢顯道隨事
剖決筆不停綴吏唱判辭燥吻續以他吏辰漏未盡盤
錯一空頃刻間聲譽沸騰顯道先領府從事至是猶兼
之往來兩間綽有餘裕大率明而不苛嚴而不暴以意

犯法者雖細弗宥過誤者哀矜而出之人被其鞭撻再拜讚謝自以為不寃也每視事曰某人某日嘗以某事來吾弗直今奚復訟某事某日嘗以某名來吾弗直今奚更名被訊者恐懼首伏吏白事顯道曰某事於法不當治某人於法不當逮輕重緩亟吏不得舞手邑境大悅往往圖像以祠之於乎顯道以學問文章為荆公門人高弟當先帝盛際物望輝赫視青雲與平地等耳而自珍太甚不少降意世變互更晦迹不耀春秋高矣屈

佐百里涵蓄深厚未嘗發泄治山陰數月政績可驚使
之得志功烈宜如何哉人知顯道學問文章而弗知從
政之才故論次為送行序云

議

玄圭議

玉質溫潤赤與黑雜真玄色也以古尺攷之其長尺有
二寸唯天子之圭為然考工記稱鎮圭尺有二寸天子
守之是也周之鎮圭以四鎮山為飾今圭之首其左右

刻四鎮山與周制同然周之鎮圭剡上今圭首雖剡而為椎形椎首乃大圭之制蓋自唐虞至於成周沿革損益大同小異猶登龍於山登火於宗彞也其瑑為雷雨之文者三代以前禮器類以雲雨為飾尺有二寸之圭以周制考之為六瑞之首其瑑雷雨以象天子法天以施澤於天下也其中為圓空者考工記稱天子圭中必注必讀如鹿車緹之緹其訓則縫也天子之圭中為穹縫以組約防失墜也三代天子之圭與夫公侯之所執

乃至用以禮神者其玉或青未育以元為色今圭色玄則其為堯圭也明矣蓋天以玄圭授禹而禹以錫堯玄天色也堯以天道治天下故圭之色象堯之治符瑞志稱水泉流通四海會同則玄圭出蓋水泉流通則水得其性水為五行之首言水得其性以明五行皆得其性也四海會同以言中外嘉靖無一民不被其澤也五行得其性兆民被其澤則行天之道同於帝堯萬邦時雍同於陶唐此玄圭所以出也五行傳以宗廟禱祠祭祀

天時為水潤下之應以謂聖人建宗廟以安祖考春秋
祭祀以盡孝道王者郊祀天地禱祀神祇望秩山川懷
柔百神罔不宗事致其齋戒鬼神歆鑒以獲福佑以和
神人至於發號施令順協天時則陰陽調而終始成如
此則水得其性皇帝奉若天道紹述先猷祭祀禱祠吉
蠲盡禮政事設施格於上下臣民慶賴遐邇惟一以故
大河澄清守臣屢奏遠夷効順史不絕書所謂水泉流
通四海會同者在於今日此玄圭所以出也

策問

治法

問蓋聞法不獨立推而行之存乎其人猶規矩繩墨雖設必有舉而用之者然後方圓曲直物莫能遁古先聖王以道制法御事不以法從人也而人惟法之從不以人擇官也而官惟人之擇官治其職而人足以任之然後以類舉而事功立焉主上念文昌政本自神考肇正官聯小大承式迨今三十有餘載實德在民頃者清蹕

俯臨天旋六部又親御翰墨延見庶工而訓迪之亦惟
元豐良法美意垂裕乎後而行之在人嘉與在事之臣
欽承彛憲以隆太平伏讀明詔曰其慎爾止無載爾偽
以制議事以公滅私無徧厥官無怠忽荒政修舉憲度
罔有不孚大哉王言與詩書所載若合符節其丁寧戒
敕至誠惻怛播告之學士大夫其亦與聞之矣今欲有
官君子體上之德意志慮虔共夙夜無或便文官修其
方法行其意各以行能功實仰稱詔旨若之何其可試

為有司言之

人才

大雅有言濟濟多士文王以寧又曰藹藹王多吉士古先哲王創業受命與夫太平守成未嘗不求端於人才而人才之衆必自人陶冶而成之械樸之作人菁莪之育材此其成之之效也恭惟皇帝若昔大猷恢崇學校以率教天下烝髦論秀而臣使之豈惟寵榮其身意者迪以經術則義理明董以師儒則道德一待以曠日持久

學優行敕而命之以官則其才皆足以有為其志皆足以有守夫以禮樂法度之備付之有官而任官者皆陶冶已成之才太平之基所以永永無極也然則上之期於多士蓋若此雖然知自貴而後外物不能挫其恒知自信而後邪說不能干其正苟輕重取予與俗轉徙而欲以所學為天下國家之用一出焉一入焉曾不足以美其身烏在其有為有守也士被教養而從政於此知所安矣不然則援其失祛其惑益其所不能亦必有道

願著於篇

史材

問史官之權甚重褒貶所及傳之無窮不可磨滅唯學
至博識至明而文足以形容之然後議論不詭於古人
詞采可傳於後世由漢以來言史者稱司馬遷自劉向
揚雄許可以後皆稱遷有良史之才諸儒韙之罔有異
說而唐蕭穎士獨深罪遷不編年而為本紀書表世家
列傳失史之法然自遷合言動為一分史目為五後世

因仍不能加損而穎士獨深罪之何也古人有言智者作法賢者更禮隨時制宜不必一道使遷之法誠是何必泥古以為失史之法邪後世不能易何哉諸生試陳之

禮制

孔子曰安上治民莫善於禮唐虞夏商周之盛禮之損益見於載籍人主美化善俗流澤子孫蓋本於此世衰道微典章隕缺嬴秦以降因陋就寡君臣勅戒不過薄

書獄訟之間雖有仁心仁聞不可為法於後世故漢宣帝時詔書每下民若更生而王吉以為可謂至恩未可謂本務也神宗皇帝監積習之弊親策多士命官討論主上丕承先志申命有司設局建官講求一代之制惟宮室之度器服之用冠昏之義祭享之節學者所宜深考願與聞之將以獻於上焉

學術

問勸學以風化四方太平之原也先王之盛時制成均

之法合國之子弟而教之下至五黨之州有序以會民而諸侯之教又命於天子所以一道德同風俗作成人材以趨事赴功雅有菁莪既醉其原自此神考勵精庶政求端於學以追治隆古訓經術恢館宇增弟子員其流及於郡國廣建學官以教多士洋洋乎成周之治宜無以進此今太學月書季考陞舍限年率舉熙寧元豐之舊士固鄉風承德矣而學之在郡國者防範糾督之法疑若未備也夫惇講授之選博延多士供億仰於公家

而命之曰學豈徒徇虛名哉惟熙寧元豐成式具在事
之未究者嘗許條列以聞將推原美意稍嚴課試選出
之法使士知所勸若之何其可願與聞之

宗學

問荀子之於勸學有言曰德操然後能定能定然後能
應學者至於能應則其有為也若決江河沛然孰能禦
之古之人或延以三旌之位而弗顧或乘田委吏而安
之或享以萬鍾之祿而弗受或簞食瓢飲而樂之彼輕

重在我而不在物故進退取舍處之裕如若然者其君用之則安富尊榮其民從之則孝悌忠信蓋存乎中者素定故建之行事若此主上留神宗學所以訓迪之非止應有司之選而已淵源經籍涵養道義其操術既定則守身從政將無施而不可諸公子仰承聖造其自得於心者宜有可言古之人能定能應者世有其人頌其詩讀其書其志可考以所得於今論所聞於古試為有司陳之將以觀所學焉